

PRAEFATIO.

Ad Quinquepartitum hoc edendum ut animum adpellerem, primo codices duo Hamburgenses effecerunt, in quos, quum multis abhinc annis libros manuscriptos, qui Hamburgi in bibliotheca Senatoria adservantur, perlustrarem orientales, praeter expectationem incidi, quorumque alterum paulo post transcripsi. Quos codices quum locis multis tum scriptura perversa, tum lacunis laborare intelligerem, ab Adolpho Friderico Stenzlero, populari meo, mihi amicissimo, qui tunc Londinii studio litterarum Indicarum operam navabat, ut hunc librum in publicum edituro mihi ex codicibus Londiniensibus aliquid subsidii pararet, petii. Neque defuit vir ille humanissimus, quo minus mihi hoc roganti obtemperaret; ex codice enim curiae Indicae Londiniensi, qui numero 1440. signatus erat, cum libris Colebrookianis eo adlato, Pantschatantri libros duos primos meum in usum litteris Latinis transcripsit. Deinde ex congerie codicum Indicorum Chambersiana, quae Berolinum deportata est, unum Pantschatantri exemplar accepi. Denique Otto Fridericus Tullbergius, Suecus, litterarum orientalium in academia Upsaliensi professor clarissimus, quocum aliquando, quum per aliquod tempus apud nos Gripesvoldiae commoraretur, familiaritatem contraxeram, apographa Pantschatantri, quae Londinii et Oxonii summa cura litteris Latinis conscripserat ipse, singulari benignitate erga me usus, mihi pervolutanda et in rem meam convertenda permisit. Duos codices Londinienses transcripserat integros, atque ex aliis scripturae varietatem partim in margine illorum apographorum, partim inter lineas adnotaverat. Quibus subsidiis liberaliter mihi concessis, Tullbergius tam insigni beneficio me devinxit, ut gratiam ei habere debeam tantam, quantam maximam animus